

Thunderbolts: Misi membimbing juara hoki generasi baharu

REAKSI



"SSTMI kilang melahirkan pemain hoki kelas dunia."

SUHAIMI SUN



"DENGAN kemudahan TNB, pasukan SSTMI Thunderbolts berjaya mengekalkan kedudukan sebagai juara Liga Hoki Remaja Malaysia sebanyak lima kali dan Piala Milo sebanyak empat kali berturut-turut."

MUHAMMAD FIRDAUS OMAR

"KAMI menjalani latihan untuk sesi pemilihan Kejohanan Hoki Remaja Dunia di New Delhi 2016."

NIK MUHAMMAD AIMAN

MELENTUR buluh biarlah dari rebungnya, ungkapan yang menepati langkah Tenaga Nasional Berhad (TNB) membangunkan sukan hoki dengan memberi penumpuan kepada pemain-pemain remaja.

Pasukan Sekolah Sukan Tunku Mahkota Ismail (SSTMI) *Thunderbolts* adalah contoh terbaik muncul juara Liga Hoki Remaja Malaysia sebanyak lima kali dan Piala Milo sebanyak empat kali berturut-turut, berkat suntikan pogram sekolah angkat TNB.

Hasilnya menyaksikan separuh daripada barisan skuad hoki kebangsaan saban tahun memamerkan wajah-wajah pemain yang pernah dinaungi oleh program pembangunan hoki TNB, khususnya melalui SSTMI *Thunderbolts*.

"Biarpun pelajar mempunyai asas untuk bermain hoki, sokongan TNB yang membekalkan tenaga jurulatih terdiri daripada beberapa bekas pemain hoki kebangsaan, peralatan sukan serta pakaian yang lengkap menambah semangat setiap pemain," kata **Muhammad Firdaus Omar**.

Menurut pelajar Diploma Kejuruteraan Mekanikal, Universiti Tenaga Nasional (UNITEN) berusia 19 tahun itu, dia menerima kemudahan tersebut daripada TNB selama enam tahun sejak tingkatan dua.

"Pelajar yang terlibat dalam sukan hoki di SSTMI juga mempunyai semangat yang tinggi, berikutan



KAMI BOLEH... Itulah semangat yang ditunjukkan pemain-pemain pasukan hoki SSTMI-*Thunderbolt* di Kelab Kilat TNB, Kuala Lumpur baru-baru ini.

hampir separuh daripada barisan pemain kebangsaan adalah pelajar-pelajar senior dari sekolah kami," ujarnya yang juga kapten pasukan hoki *Thunderbolts*.

Rakan sepasukan, **Danial Asyraf Abd. Ghani**, 19, dapat merasakan perbezaannya dan percaya peluang menjalani latihan bersistematis dengan kelengkapan lebih sempurna sejak di SSTMI, meningkatkan keyakinan para pemain untuk berak-

si dengan lebih berkesan di padang.

"Jika di Sekolah Menengah Anderson, Perak saya ditimbing dan dilatih oleh guru sekolah, di SSTMI bekas pemain kebangsaan seperti Lailin Abu Hassan dan Wan Roslan Wan Abdul Rahman menjadi jurulatih kami.

"Kemudahan lengkap seperti gimnasium, peralatan serta sistem pemakanan yang baik, membolehkan kami meningkatkan kecekapan dan

sentiasa bersedia untuk beraksi," katanya yang juga pelajar pra-universiti tahun pertama SSTMI.

Seorang lagi pelajar pra-universiti SSTMI, **Nik Muhammad Aiman Nik Rosemi**, 19, mengakui bertuah di atas peluang mengikuti latihan pasukan SSTMI-*Thunderbolts* sejak tahun 2014.

"Jurulatih memberi pengetahuan dan taktik berkesan sewaktu berdepan dengan pihak lawan di atas padang. Persiapan mental juga diberikan pada setiap perlawanan.

"Seramai 20 pelajar menjadi pemain pelapis SSTMI-*Thunderbolts*. Kini kami menjalani latihan untuk sesi pemilihan skuad ke Kejohanan Hoki Remaja Dunia di New Delhi pada tahun 2016," katanya.

Sementara itu, Pengetua SSTMI, **Suhaimi Sun Abdullah** berkata, kerjasama di bawah program sekolah angkat hoki TNB (*Thunderbolts*) mempunyai beberapa kesan positif kepada pasukan hoki sekolah.

"Beberapa kejayaan yang diraih pasukan hoki SSTMI menyuntik semangat para pemain supaya sentiasa mahu melakukan yang terbaik. Mereka juga menjadi pemain yang berfikir atau *thinking players* dan seterusnya menjadi contoh kepada pemain-pemain lain.

"Ja turut mendorong SSTMI sebagai sekolah hoki cemerlang. Berikutan itu, ramai pelajar ingin belajar dan juga bersukan untuk menaikkan imej sekolah," katanya.

Menurutnya, secara tidak langsung SSTMI menjadi 'kilang' untuk melahirkan pemain hoki kelas dunia, sekali gus membantu pasukan hoki negara memperbaiki kedudukan atau *ranking* di peringkat dunia.

"Impian saya adalah agar SSTMI menjadi sebuah Akademi Hoki *Thunderbolts* yang boleh membantu pasukan hoki negara muncul sebagai nombor satu di dunia," tegasnya.

info

- TNB belanja RM11.8 juta sebagai tajaan kepada Konfederasi Hoki Malaysia (MHC) untuk TNB-MHL sejak tahun 2006.
- Program sekolah angkat hoki TNB bermula tahun 2006. Dua sekolah sekarang dan bakal ditambah lagi.
- Klinik hoki di 37 buah sekolah PINTAR sejak tahun 2009.
- Melahirkan ramai pemain hoki negara berstatus legenda.



PASUKAN Sekolah Sukan Tunku Mahkota Ismail (SSTMI) *Thunderbolts* telah menjuarai Liga Hoki Remaja Malaysia sebanyak lima kali manakala Piala Milo sebanyak empat kali berturut-turut.